

Gronda actività da fabrica a Tarasp

Aint illa zona Curtin dess nascher nouva vita

DA BENEDICT STECHER/ANR

■ Davo bundant vainch ons cha la zona Curtin i'l center dal cumün da Tarasp exista s'haja cumanzà l'utuon passà da fabricar. Previs sun intant chasas singulas ed üna surfabricaziun cun abitaziuns per fittar e d'aigna proprietà. Aint il quartier Curtin a Tarasp spordscha il cumün sco possessur dal terrain da fabrica parcelas per cundiziuns fich favuraivlas per abitaziuns e chasas d'abitar. Intant vain fabrichada üna chasa singula, üna seguonda es profilada ed üna surfabricaziun cun duos chasas cun 12 abitaziuns da fittar e 5 d'aigna proprietà. «Per Tarasp chi nun ha gnü i'ls ultims ons üna gronda actività da fabrica exista uschea uossa la pussibilità da ringiuvinar la populaziun da cumün», disch Christian Fanzun, il capo da Tarasp. Per iniziar il fabricar a Curtin s'ha constituida la Cooperativa da fabrica Curtin sco patrun da fabrica. La basa per garantir la finanziaziun dal proget es statta la decisiun da la radunanza cumünala da la mità d'october 2012 chi ha concess ulteriurs 400 000 francs sco impreaist, vuol dir da la vart dal cumün totalmaing 1,6 milliuns francs. Insembel cullas parzialas dals commembers da la cooperativa, cun l'impreaist da la banca e culla vendita dad abitaziuns es la finanziaziun sco ha'l capo manzuna garantida. La fin d'october 2012, davo la decisiun importanta da la radunanza cumünala, s'haja cumanzà a fabricar. Las duos chasas cun 17 abitaziuns chaschunan cuosts da fabrica da var 9 milliuns francs. Sco cha la chanzlia cumünala ha infuormà dess esser la surfabricaziun finida per la stà obain per l'utuon 2014.



L'attività da fabrica es per Tarasp üna pussibilità per ringiuvinar la populaziun in cumün.

FOTO: B. STECHER

Situà a mez cumün

Il quartier Curtin es situà in üna costa chi guarda vers mezdi e saira ed es fich sulagliv e central. Id exista la pussibilità da dvanter commember da la cooperativa e d'avair pled in chapitel. Davo bundant vainch ons sainza actività da fabrica aint illa zona Curtin vaivan blers temma cha tuot la planisaziun e

tuot ils cuosts pella cumprita da terrain e la munaida impuondüda da vart dal cumün sajan stats per nüglia. Id ha vulgü gronds sforzs da vart dal cumün per cha l'attività da fabrica possa cumanzar. Ouravant es gnüda fabrichada dal cumün l'infrastructura cun lingias d'aua, chanalisaziun, electricità, la via ed oter plü. Il böt principal da la su-

prastanza cumünala es sco cha Christian Fanzun repetta cha Curtin dess dar al cumün da Tarasp nouva vita cun novas famiglias, activar la scöula, la butia ed eir la vita culturala. Il quartier Curtin spordscha a famiglias giuvnas la pussibilità da s'integrar aint illa regiun e da viver a Tarasp suot cundizchuns favuraivlas.